

REGIONAL NEWS BULLETIN

HEADLINES (EVENING)

- 1. Home Minister Pu K. Sapdangan thuthar thehdarhtute chu sawrkar fak ngawt lova a kal dan dik lo te ziaak a, fakseltu tha ni zel turin a chah.
- 2. Art & Culture Minster Pu C Lalsawivungan Mizo ten History dik an neih theih nan sorkarin hma nasa takin a la a ti.
- 3. Supreme Court chuan Allahabad High Court in pawngsual chungchang a thutlukna chu dan sakin an thutlukna chu hriatthiamna tlachham tiin a sawi.
- 4. Union Electronics and IT Minister Ashwini Vaishnaw chuan Indian Cyber Crime Coordination Centre (I4C) atanga an thudawn bawhzuiin IT intermediary rules hnuaiah gaming site 1410 an block tawh tih a sawi.



HOME MINISTER

Home Minister Pu K. Sapdanga chuan thuthar thehdarhtute chu Democracy sawrkar lungphum palina (4th Estate of Democracy) an nih angin, sawrkar fak ngawt lova a kal dan dik lo te ziaak a, fakseltu tha ni zel turin a chah.

Vawiina Champhaia I&PR Auditorium, CHANEM Building-a Mizoram Journalist Association (MJA) General Conference vawi 51-na a hmanpuinaah he thu hi sawiin Home Minister chuan thuthar thehdarhtute hnen atanga sawrkar fakselna a hmuha a lawm thin thu a sawi a. Mizoram mamawh ber chu siamtharna (reformation) ni a a hriat thu sawiin, he mi kawngah hian MJA member-te chu tan la thar turin a chah a. Khawtlang kal dan siamthat kawngah te, politics leh mipuite rilru sukthlek siamthat kawngah te chanchinbumi te chu thawhhlawk thei ber tura a ngaih thu pawh sawiin, Home Minister chuan ziaak ngeia dah thu chuan chungchuanna bik a nei a ni, a ti.

Home Minister chuan MJA chu pawl hlun leh pawimawh tak - an eizawnna hmanga khawtlang rawngbawltu leh sawrkar khalh ngil thin tute awmna a ni, a ti a. MJA hrulaitute kaihhruaina hnuaia General Conference vawi 51-na hial thleng theia an awm chu ropui a tih thu sawiin, ze hloh miah lova hei chen an kal thei chu thil chhinchhiahtlak tak a ni, a ti.

MJA President Pu C. Lalrambuatsaiha pawhin he hunah hian Mizo hnam inpumkhat a pawimawh thu a sawi a. MJA member-te chu teirei peihna leh insumtheihna nei turin a fuih a ni. Vawiin chawhnu khan MJA member kal khawm te hian ro an rel chhunzawm a ni.



LADC CHAIRMAN

Lai Autonomous District Council Chairman atan Pu T.Zakunga Vawmbuk bialtu MDC chu chuhtu awm lova thlan a ni.

Chairman thlanna LADC session hi vawiin khan Protem Chairman Pi C. Biakthansangi kaihhruaiin LADC Session Hall-ah neih a ni a. Chairman Pu VL. Hmuaka LADC leh Dy Chairman Pu H. Lalmuansanga te chuan tun thla ni 19 khan banna an theluh avangin, LADC Sorkar chu Chairman leh Dy. Chairman nei lovin a awm a, Governor chuan lehkha ti chhuakin, Pi C. Biakthansangi, MDC chu Protem Chairman LADC atan a ruat a ni.

LADC CEM Pu V. Zirsanga chuan Chairman thar kaihruaina hnuaiah an house felfai tak leh tluang takin ro a rel a beisei a ti a,



VIKSIT BHARAT YOUTH PARLIAMENT

Viksit Bharat Youth Parliament-a Mizoram aiawh thlanna chu vawiin khan Aizawl Vaivakawn venga Cultural Centre cum Auditorium-ah neih a ni a, a pumpuiah Angela Vanlalduhsaki, Mizoram Christian College, English department-a 6th semester zirlai, Aizawl Kulikawn West venga cheng chu pakhatna a ni a. Mizoram ai a awh dawn a ni.

Angela Vanlalduhsaki chuan a kalna leh zel turah mahni inrintawkna a pawimawh hlea a hriat thu a sawi a, a thalai pui te pawh, mahni inrintawkna nena an hmaa inchhawp thil te hmachhawn thei se a tih thu a sawi a ni.

Byte of Angela Vanlalduhsaki...

Viksit Bharat Youth Parliament hawnna hun hi Mizoram Youth Commission Chairman Pu Malsawmzuala Ralte chuan a hmanpui a, thusawiin, rorelna ina thusawi dan hmanga inel tur thalaite chu mahni inthunun turin a fuih a. Mizoram mi an nih angin state hmasawwna tura eng emaw tala tha thawhtu nih tum tur leh chumi a thlenna tur chuan tum nghet nei turin thalaite a chah a. Social media chu thil tangkai tak a nih thu leh engkim deuh thaw a awm thu a sawi a, hetihruah hian khawih chin tawh neih a ngaih thu leh a tangkai zawnga hman a pawimawh thu a sawi a ni.

Byte of Pu Malsawmzuala Ralte...

Viksit Bharat Youth Parliament hawnna inkhawmah hian Sports & Youth Services Secretary Pu Lalramsanga Sailo pawhin thu sawiin Viksit Bharat Youth Parliament chu kum 2019 atanga tan tawh a nih thu leh Prime Minister Pu Narendra Modi a’n thalaite hmasawwna tura a hmathlir zinga mi a nih thu a sawi a. Thalaiten India ram chu kum 2047-ah ram intodelh a nih theihna tura ngun taka an ngaihtuahna an sen theihna tura an fuankhawmna a nih thu a sawi a. Pu Lalramsanga Sailo chuan Mizoram chu tun hnaiah ram pum huapa National Youth Parliament kaihhnawih programme hrang hrangah a che tha hle tih a sawi bawh a ni.

Hawnna inkhawm hman hnuaiah hian State Level Youth Parliament Competition buatsaih chhunzawm a ni a. District hrang hrang atangin thalaiten intihsiakna hi an hmachhawn a ni.



ART& CULTURE

Art & Culture Minster Pu C Lalsawivungan Mizo ten History dik an neih theih nan sorkarin hma nasa takin a la a ti.

He thu hi vawiina Dungtlang khuaa Thangchhuah Mual Lungphun hawna leh Lianchhiari leh Pasaltha Lalhmingliana Lungphunnaah sawiin Minister Pu C. Lalsawivunga chuan, Mizote History ziak chu a dik lo tihna lam ni lovin a famkim tawh lo a ni, a ti a. History famkim zawh chu thlalaiten neih an duh a. Nikum lama Art & Culture Dept leh Lunglei HATIM ten North Eastern Council Shillong atanga tanpuina an hmuh angin nikum November atangin Dungtlang hmun hlui leh thlan hlui te endik hnathawh tan nghal a ni a. Kumin February ni 25 thleng khan Dungtlang Khaw hmun hlui a hmanlai thlan leh hmun hluite chu Archaeological Survey of India (ASI) ten an lai a ni a ti. Dungtlung thlanmual hlui a ruhro an laichhuah ang te chu Becca Laboratory Florida, USA-ah thawn a ni a. Nimin khan chung ruhro enfiah tura thawn thlak te result chu a chhuah thu leh ASI in an ruhro a laihchhuahte chu kum 1740 atanga kum 1800 AD chhung ami nia hriat a ni a ti.

DNA enfiah leh thil chi dang enfiah turin Birbal Sahni Institute of Palaeosciences, Lucknow ah ruhro sample test turin thawn niin a result a chhuah vat beisei a ni a. Bel lei te, bel keh them, thir them sample ang chi te pawh chu nikum November khan phai lamah thawn alo ni tawh thu a sawi bawh a ni.

He hun hi Health Minister Pi Lalrinpuui pawhin a hmanpui a, Thangchhuah Lungphun, Lianchhiari Lungphun leh Pasaltha Lalhmingliana Lungphun hawna hun hman a ni a, thangchhuah lung hi Pu Lalduhoma, Pu Zoramthanga, Pi Lalrinpuui, Pi B.Sangkhumi, Pu David Zohmangaiha leh Jeremy Lalrinnunga te hminga phun a ni.

He hun hi Pipu Sulhnu Humhalhtu Pawl Organising Committee buatsaih niin kum 1997 khan mi 52 te thangchhuah lung an lo phun tawha, vawiina mi parukte nen helai hmuna thangchhuah lung phunte hi mi 58 an tling tawh a ni. Organising Committe lam chuan Mizo hnam tana mi hming tha te tan he Thangchhuah lung hi phun zel an tum thu an sawi bawh a ni.

<><><>

HNAHTHIAL POLICE

Hnahthial Police Duty te chuan an thu dawn bawhzuia tlaivara an chan hnuah tukin khan Khawhri-ah leh Tuichang lei bulah Heroin no. 4 hawng sawmthum pakua, gram 459.22 an man a. Heng ruihhlo an man te hi tualchhung rate chuan cheng nuai 13, sing 7 & 7,660 man ni a chhut a ni.

Khawhri-a Heroin an man hi gram 217.22g (hawng 17) niin tualchhung rate chuan cheng nuai 6 sing 5 & 1,660 man hu a chhut a ni a. Isak Lalhriatpuia, kum 35, Lunglei Farm Vengei leh R. Lallawmawma, kum 21, Lunglei Ramthar inti te ip atanga an man niin an phurhna Scooter, Ray Z dum leh an mobile phone pawh an man tel bawh a ni.

Tuichang lei bula an man hi gram 242 (hawng 22) niin tualchhung rate chuan cheng nuai 7 sing 2 & 6,000 man hu a chhut a ni a. A phurtu, Lalhunmawia, kum 25, Thingsai Saikuti Veng leh Lalmangaihsanga, kum 31, Lunglei Ramthar Veng inti te hnen atanga man niin an phurhna lirthei leh an mobile phone an man tel bawh a ni.

Vawiin vek khan Hnahthial Police te chuan thubuai an ziaklut a, an mi mante hi Lunglei lamah hruai nghal an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

SUPREME COURT

Supreme Court chuan Allahabad High Court in pawngsual chungchang a thutlukna chu dan sakin an thutlukna chu hriatthiamna tlachham tiin a sawi. Allahabad High Court thutlukna hian inhnialna tam tak a tichhuak a. Hmeichhe hnute tham sak emaw an kekawr nem chi pyjama hak pawhchhiat sak chu pawngsual tumna a tling pha lo tiin Allahabad High Court chuan a rel a. Pawngsualtua puhte hrem tur chuan hei aia chiang lehzualin a thilsual tih nemnghehna a awm a ngai tiin High Court chuan a rel a ni.

He thutlukna hi Supreme Court chuan na taka sawiselin mihring ngaihtuahna fim pu loa thutlukna siam a ni tiin a sawi a. Supreme Court chuan sawrkar laipui, Uttar Pradesh sawrkar leh midang he thubuaia inrawlhthe chu March ni 17 thutlukna chungchangah hian hriattirna a pe nghal bawk a ni.

<><><>

GAMING SITE BLOCKED

Union Electronics and IT Minister Ashwini Vaishnaw chuan Indian Cyber Crime Coordination Centre (I4C) atanga an thudawn bawhzuiin IT intermediary rules hnuaiah gaming site 1410 an block tawh tih a sawi. Lok Sabha-a zawhbelhna chhangin Pu Vaishnaw chuan inthapna leh pawisa khelhna lam chi chu State thuneihna hnuaia awm state list anih thu leh a thunun turin dan thar state sawrkarin a siam thei tih a sawi a ni.

<><><>

FOOD AND PUBLIC DISTRIBUTION

Union Food and Public Distribution Minister Pralhad Joshi chuan eitur pawlh danglam veng turin sawrkar chuan chak takin hma a la tih a sawi. Vawiina Lok Sabha-a zawhbelhna chhangin Pu Joshi chuan sawrkarin eitur thianghlim lo hekna a dawn chuan uluk takin a chhui zui nghal zel tih a sawi a. Mihring ei tlak loh khawpa thianghlim lo a awm anih chuan thubuai siamsak nghal zel a nih thu a sawi bawk a ni.

<><><>